

rie pour auoir touché le bord de la robe de Iesus Christ , combien plustost sera gueri celui qui sera reuestu de Iesus Christ mesme , & sera couuert de sa Iustice. Il sauuera nos ames en son Royaume , il changera cet habit de Iustice en habit de gloire , lors que despoillez de ce domicile corporel nous serons receus en ceste habitation celeste , & que ce qui est mortel en nous sera englouti par la vie.



SERMON III.

Sur le vers. 15. du 1. chap. de la premiere Epistre de Saint Paul à Timothee.

Ceste parole est certaine & digne d'estre entierement receue. C'est que Iesus Christ venu au monde pour sauuer les pecheurs.

Nous faisons profession de croire en Iesus Christ conformément à ce que Lui mesme commande: Vous croyez en Dieu, croyez aussi en moi. S. Iean 14.

1. Et l'œuure de Dieu est que vous croyiez en celui qu'il a enuoyé. S. Iean 6. 29. S. Paul aussi

aussi dit au Gæolier qui lui demandoit ce qu'il lui falloit pour estre sauué. Act. 16. 30. & 31. Croi au Seigneur Iesus Christ & tu seras sauué toi & ta maison. Preue claire de la Diuinité de Iesus Christ. Car l'Escriture dit, que maudit est l'homme qui se confie en l'homme. Pourtant les Orthodoxes accusoyent iustement les Arriens d'estre idolatres, en ce que nians la Diuinité Eternelle du Fils, neantmoins ils croyoyent en lui & y mettoyent leur fiance.

Naturellement nous sommes subiects à nos volonteZ, & nos volonteZ subiettes à pecher, & ce peché subiect à malediction, Psal. 42. Vn abisme semondvn autre abisme. Vne seruitude en attire vne autre. Car estre serfs du Diable, c'est estre esclaves d'vn esclau. Valets d'vn bourreau, qui lui mesme attend le supplice, condition non seulement au dessus de la liberté : mais mesmes au dessous de la seruitude.

Or Dieu n'a point voulu que le Diable vinst à bout de ses desseins, il a consideré que nous estions son ouurage, il a veu en l'homme quelques restes de son image : il a estimé conuenable à sa bonté d'auoir plus d'esgard au restes de son œuvre qu'à tout l'œuvre du Diable : aussi auoit-il créé l'homme afin qu'il fust glorifié par lui en plus d'vne façon, & qu'il fust non seulement matiere de sa iustice, mais aussi employ de sa misericorde.

Mais le remede ne pouuoit venir de nous, ains a falu recourir à la source de vie : Comme ceux qui passans les deserts de Syrie ont

E x

laidé esteindre le feu qu'ils portent, le ralu-
ment au Soleil avec artifice, ainsi ayans perdu
ceste clarté naturelle, il a falu auoir recours à
ce Soleil de Iustice, & l'homme mort en pe-
ché que pouuoit-il contribuer à se remettre
en vie ? Pour donc acheminer ce Conseil que
Dieu de toute éternité s'estoit proposé pour
nous sauuer, Voici comme du cabinet de Dieu
fortit son fils vnique la parole Eternelle, afin
que ceste parole par laquelle toutes choses au-
oient esté faictes remitt les choses leur en-
tier. Ce Fils vnique est venu pour nous faire
enfans de Dieu, celui qui est seul libre en la
maison est venu pour nous affranchir, comme
me il dit lui mesme : si le fils vous affranchit
vous serez vrayement francs, Iean 8.36. Celui
qui est la Sapience du Pere est venu nous
instruire & informer du Conseil de Dieu, ne
paracheuant pas seulement l'œuvre de nostre
Redemption, mais aussi l'annonçant, n'estant
pas seulement le prix, mais aussi le heraut de
ceste reconciliation.

Ce que ie di non pour exclurre le Pere ou
le Sainct Esprit de l'œuvre de nostre redem-
ption: car le Pere a donné son Fils, & le Sainct
Esprit a sanctifié sa Conception, Le pere nous
reçoit en grace pour l'amour du Fils, & le
Sainct Esprit en imprime la certitude en nos
cœurs. Mais le Fils est appellé particulièrement
le Sauueur & le Redempteur, parce qu'il s'est
vni personnellement à nostre nature, & en
icelle a porté la punition que nous auions
meritée, & accompli la Iustice que nous de-
uions

uions. Hebr. 1.3. Et ayant fait (comme dit l'Apôstre) par soi mesme la purgation de nos pechez, s'est assis à la dextre de la Maïesté de Dieu es lieux très-hauts. Là il intercede pour nous, & verse d'enhaut sur nous les graces de son Esprit.

Dés le commencement & de tout temps l'Eglise de Dieu a esté instruite en ceste doctrine & entretenue en ceste attente : car il est la semence promise qui deuoit briser la teste du serpent. Il est ceste Colombe qui apres vn deluge de perdition a apporté le rameau d'oliue en signe de paix. Il est ce sacrifice substitué à Isaac lors que le pere auoit la main leuee pour nous frapper. Il est cet Agneau du sang duquel les consciences arrousees sont exemptes d'estre frappees de la main de l'Ange destructeur. Il est le serpent d'airain esleué au desert dont la veuë guerit les morsures de l'ancien serpent. Son incorruption est cet encens d'Aaron qui arreste la playe du peuple, Nomb. 16. Son benefice estoit figuré par la deliurance des captifs retirez es viles de refuge, lesquels estoient mis en liberté par la mort du souverain Sacrificateur. Comment monterons nous au Ciel sans ceste eschelle de Iacob qui joint le Ciel à la Terre, ou qui nous portera en ceste piscine au premier mouuement de nos craintes pour receuoir guerison ? Toutes ces graces nous sont representees par le nom que le Pere lui a donné qui est Iesus, duquel il nous faut parler.

Ce nom de Iesus lui a esté donné par l'An-

ge comme le recite l'Euangeliste , Matth. 1. 27. Tu appelleras son nom Iesus , car il lauera son peuple de ses pechez. Les noms sont donnez aux choses pour les recognoistre : mais il aduient qu' lquefois qu'on les donne à contre-sens. Iudas signifie louange : mais il n'y eut iamais homme chargé d'une plus iuste infamie, Abimelech estoit vn tyran & vsurpateur , & toutesfois le nom signifie le Roi ou le pere. Nemmi veut dire agreable & plaisante , mais elle vouloit qu'on l'appellast Mara, pource que Dieu l'auoit soulée d'amertume. Tel se nomme Clement qui est cruel. Tel se fait nommer Boniface qui prend plaisir à mal faire. Tel s'appelle Celeste qui met toute son estude à bastir vn Empire en la terre.

Mais Dieu ne donne pas ainsi les noms : Car comme en la creation par la seule parole il a fait toutes choses , ainsi en donnant nom aux choses il les fait telles qu'il les appelle. Comme vouloir en Dieu & faire sont vne mesme chose , aussi à lui parler & vouloir c'est tout vn. Ainsi il appella Abram , Abraham, & le fit estre pere de plusieurs nations. Il a suggeré par son Esprit à Zacharie que son fils fust appelé Iean , qui signifie grace & misericorde , & l'a fait annonciateur de grace & misericorde. De là vient qu'appeller quelquefois en l'Escriture signifie donner la grace par effect. Comme il est dit de Bezeleel , Voici j'ai appelé par son nom Bezeleel fils l'Vri , lequel j'ay rempli d'esprit & de sagesse. Exod. 31. 1. Et Dieu dit à Israel par son Prophete , Israel ne crain

ne crain point, car ie t'ay racheré, & t'ay appelle par ton nom, tu es à moi Esa 43. Le nomlequel Dieu donne à Israel, c'est d'estre son peuple, & parce que Dieu l'appelle ainsi, on conclud necessairement qu'il le fera estre ce qu'il l'appelle, & le gardera comme vn peuple qu'il recognoist estre sien: mesmes c'est chose familiere és Prophetes que Estre appellé, vaut autant que Estre: Comme en Esaie 1. 26. On t'appellera Cité de Iustice, Ville loyale. Et ailleurs: On appellera son nom l'Admirable, le Conseiller, &c. 9. 5. Et on appellera son nom Emmanuel, 7. 14. Dieu donc appellant son Fils Iesus, c'est à dire Sauueur, le faisoit estre tel, & en ce nom estoient encloses toutes les promesses de l'Euangile.

Il se faut neantmoins garder, que touchez de reuerence enuers ce nom Sainct & sacré, on ne decline à la superstition, pour attacher aux syllabes la vertu qui appartient à la personne, comme on fait auiourd'huy en l'Eglise Romaine, en laquelle la personne de Iesus à la feste qu'on appelle la feste Dieu: mais son nom à vne autre feste à part, qu'on appelle la feste du nom de Iesus. A la prononciation du nom de Iesus on oste son chapeau, mais on ne l'oste pas au nom de Christ, ni au nom de Sauueur, qui vaut autant que Iesus, non pas mesmes au nom de Dieu. Que s'ils ont raison en cela, il est croyable que l'Apostre Sainct Paul a vsé plus souuent du nom de Christ, que du mot de Iesus pour ne nous obliger à des salutations frequentes. Le pis est, que pen-

dant qu'on honore le mot & le son des syllabes on deshonne la personne, introduisans d'autres mediateurs, vn autre sacrifice que sa mort, vne autre purgation que son sang, vne autre doctrine que sa parole. Pourtant quand vous lisez qu'au nom de Iesus tout genouil se ploie. Phil. 2. 10. Et qu'il n'y a point d'autre nom sous le Ciel, par lequel il nous faille estre sauuez. Act. 4. 12. Par le nom de Iesus n'entend pas le mot: mais la personne, la vertu, son autorité, au mesme sens que nous baptisons au nom du Pere, &c. Et que nous disons, nostre ayde soit au nom de Dieu. Et ne croyez pas que le Diable se lie par des syllabes, ou qu'il ait plus peur du nom de Iesus que du nom de Christ. Plustost soyez ialoux de sa gloire, & ne transportez le titre de mediateur, ni comme partie de nostre redemption à aucun autre, comme on fait en l'Eglise Romaine, où non seulement on inuoke les Saints comme mediateurs d'intercession, mais aussi on les fait nos redempteurs, puis qu'on croit qu'ils ont satisfait pour nous, & que leurs peines & satisfactions supererogatoires tournent en l'acquit des ames & sont imputees aux autres, estans reservees pour cet effect par le Pape dans le tresor de l'Eglise, & distribuees par les Indulgences. Et que le Prestre demande en la Messe la grace de Dieu & le salut, non seulement par l'intercession des Saints, mais aussi par leur merites. Iesus Christ a seul preséle pressoir de l'ire de Dieu. Esai. 63. 3. Il n'y a point de salut en aucun autre. Act. ch. 4. v. 12.

Il peut sauuer à plain ceux qui s'approchent de Dieu par lui. Hebr. ch.7.v.25. Son sang nous nettoye de tout pe. hé. 1. iean chap.1. vers.7. afin que nul ne s'imagine aucune autre satisfaction.

Maintenant comparez la condition où estoit l'homme, avec la condition en laquelle Dieu nous a mis par sa Redemption : alors nous considerions Dieu comme Iuge, & maintenant comme Pere, alors sa Iustice nous estonnoit, & maintenant sa bonté nous assure: alors l'homme se cachoit sous le figuier, & maintenant il approche de l'arbre de vie avec assurance: alors vn Ange avec vn glaiue flamboyant le chassoit de Paradis, maintenant les Anges s'esioüissent de la conuersion d'un pecheur, & se campent, autour de ceux qui craignent Dieu. Alors l'homme fut exclus du Paradis terrestre, & maintenant le Paradis Celeste nous est ouuert, pour des ceintures de feuilles de figuier nous auons la manteline de la Iustice, pour ces quatre fleues qui couloyent par le Iardin, nous auons ces quatre qui decouloyent de Iesus Christ, lequel nous est fait de par Dieu, 1. Cor. 1.30. Sapience Iustice, Sanctification & Redemption. Nous ne disons plus nous mourrons pource que nous auons veu Dieu : ains nous viurons, pource que Dieu s'est fait voir aux hommes, ayant reuestu nostre nature. Pourtant esioüissons nous à la venue de ce Sauueur, & desployons non point nos habits, comme ces Iuifs qui croient

Ozanna , mais nos affections , rendons nous compagnons des Anges , difans avec eux. Luc 2. 14. Gloire soit à Dieu és lieux tres-hauts , en terre paix , enuers les hommes bonne volonté: Car si eux qui y auoyent moins d'interest se sont tant esiouys : combien plus nous ausquels ce salut est annoncé, en quoi nous auons plus d'obligation.

Quelqu'un dira : Il est voirement Iesus & le Sauueur : mais non pas de tous , & de fait il dit, Iean 17. 6. Je ne prie pas pour le monde , mais pour ceux que tu m'as donné du monde. Et en administrant la coupe , Que son sang a esté respandu pour plusieurs: il ne dit pour tous. Neantmoins on peut dire avec verité que Iesus Christ est le Sauueur & Redempteur de tous les hommes. 1. Tim. 2. 6. Comme dit saint Paul, il s'est donné en rançon pour tous. Et saint Iean. Il est la propiciation pour nos pechez. 1. Iean 2. 2. Et non seulement pour les nostres , mais aussi pour ceux de tout le monde. Car encores que tous ne soyent sauuez parmi , si est-ce qu'il a payé vn prix suffisant pour sauuer & racheter tous les hommes , & ce que quelques vns ne sont point sauuez vient de leur incredulité , & non de l'insuffisance du prix de nostre redemption. Comme s'il y auoit vne herbe propre à guérir tous ceux qui ont la peste, mais il y en a qui meurent faute de s'en seruir.

Christ ou Messias , l'un Grec , l'autre Hebreu , valent autant que Oint & Sacré. C'est pour denoter les offices de nostre Seigneur, d'au-

d'autant que selon la coustume vſitée en Israël les Rois, Sacrificateurs & Prophetes estoient oints, 1. Sam. 10. & 16. Mesmes les Rois Payens sont appellez Christs, Messies ou Oincts, 2. Rois 9. Comme Cyrus, Es. 45. Ainsi a dit l'Eternel à son Oinct, ſçauoir à Cyrus. Exo. 29. 7. 30. 24. Aussi estoient oints les Souuerains Sacrificateurs ſelô le commandement fait à Moÿse en l'Exode, où la confection & huile y est décrit 1. Rois 19. Quant à l'onction des Prophetes nous en auons l'exemple au commandement qui fut fait à Elie d'oindre Elifée, Ps. 105. Et aux Pſeaumes les Prophetes sont appellez Oincts. Ne touchez point à mes Oincts & ne nuisez point à mes Prophetes. Ces trois charges sont attribuées à Iesus Christ en la parole de Dieu. J'ai oinct mon Roi sur ma ſaincte montagne, est-il dit au Pſeume 2. Et les Sages en l'Euangile ſuiuants l'estoile demandent, où est le Roi des Iuifs qui est nay? car nous auons veu ſon estoile. Lui meſme ſe dit estre tel deuant Ponce Pilate, Nay pour cela & pour cela venu au monde.

C'est pourquoy il a falu qu'il fuſt iſſu de la lignée de Iuda qui estoit la lignée Royale, & de la race de Dauid.

Ceſte ſeule Prophetie du Ps. 110. ſuffit pour authoriser ce titre de Sacrificateur. Tu es Sacrificateur eternellement à la façon de Melchisedech. Et à cela est employée la pluspart de l'Epistre aux Hebreux, notamment le ch. 2 il a fallu qu'il fuſt Souuerain Sacrificateur, misericordieux & fidele, és choses qui doiuent estre ſaiètes enuers Dieu, afin de faire la propi-

tiarion pour les pechez du peuple.

Lui mefine est appellé Prophete, au Deuteronomie 28. & aux Actes 7. Le Seigneur vostre Dieu vous suscitera vn Prophete tel que moi du milieu d'entre vos freres, escoutez-le dont aussi l'Apostre aux Heb. 3. 1. l'appelle Apostre & souuerain Sacrificateur de nostre profession. Et en Esaïe, L'Esprit de l'Eternel est sur moi, pourtant, il m'a oint pour Euangelizer aux debonnaires. Ceste onction a esté principalement, lors que ceste voix est venuë du Ciel, Matth. 17. 5. Cestui-ci est mon Fils bien-aymé auquel i'ai pris mon bon plaisir escoutez-le. Car par là il est establi Pasteur de l'Eglise pour annoncer la volonté de son Perre.

Or ea ceci notez le rapport de ces trois charges entre elles, & d'ou elles tirent leur origine. Car elles nous meinent à la consideration de trois vertus ou proprietz de nostre Dieu, dont naissent tous les bien-faits qu'il distribue à son Eglise. C'est sa puissance. Sa Bonté. Sa Sagesse. La premiere par laquelle il peut. La 2. par laquelle il veut nous bien-faire. Et la 3. par laquelle il dispose les moyens conuenables pour y paruenir. De là naissent ces trois charges. Car par la Royauté de Iesus Christ, il desploye sa puissance salutaire. Par la Sacrificature sa bonté, par la Prophetie sa sagesse. Sa Royauté nous regit & defend. Sa Sacrificature nous rachete. Sa Prophetie nous instruit. Et le lieu entre ces trois charges est que par sa Prophetie il nous annonce qu'il nous veut donner par sa Royauté les biens qu'ils nous a-

chetez

chetez par la sanctification. Encores n'est ce pas tout, car ces trois vertus diuines, & ces trois charges du fils de Dieu, produisent ou au moins requierent en nous trois vertus, esquelles consiste tout le deuoir du Chrestien. C'est que la Royauté nous oblige à crainte, la Sacrificature plante en nos cœurs l'amour. Sa Prophetie produit la foi par laquelle nous nous fions en ses promesses: adioustez que la Royauté corrige nos vices. La Sacrificature subuient à nos craintes: Et la Prophetie remedie à nostre ignorance, qui sont les trois maux esquelles consiste la misere de l'homme, sçauoir la peruersité. La subiectiō à maledictiō & l'ignorance. L'onctiō par laquelle Iesus Christ a esté oint pour estre Roi, Sacrificateur & prophete, consiste en ces deux points, en l'establisement, & en ces charges, & és dons & graces requises à vn tel office; qui sont choses fort differentes.

Autre chose est la charge, & autre la suffisance, plusieurs ont les charges qui n'ont pas la capacité, si ce n'est peut estre au Papat, où la science est attachee à la chaire, en laquelle si tost qu'un homme est assis il ne peut errer en la foi.

L'onctiō de Iesus Christ lui donne & les charges & les dons necessaires, quant à la charge l'Escriture dit qu'il y a esté esleu & ne s'y est point ingeré. Heb. 5. Nul ne s'attribuē cet honneur, s'ins celui en iouuit qui est appelé de Dieu, comme Aaron. Pareillement aussi Christ ne s'est point glorifié soi-mesme pour estre Souuerain Sacrificateur, mais celui l'a

gloifié qui lui a dit, Tu es mon Fils, ie t'ai au-
 iourd'hui engendré. Et en lui seul ces charges de
 Roi & Sacrificateur ont esté compatibles: tes-
 moin le Roi Ozias frappé de lepre pour auoir
 pris l'encensoir.

Quant aux dons & graces, il ne les a point
 receuës comme les hommes les reçoient, car
 Dieu ne lui départ point son Esprit par mesure.
 Iean 3. Il lui a donné la mesure comble. Il a vou-
 lu que toute plénitude habitast en lui corporel-
 lement, Psa. 45. Dieu l'a oinct d'huile de liesse
 par dessus ses compagnons. C'est chose vñitee en
 l'Escriture d'appellee les graces du Sainct Esprit
 vñe Onction. L'Esprit du Seigneur est sur moi
 d'autant qu'il m'a oinct. Sainct Luc 4. Et vous
 avez receu l'onction de par le Sainct. 1. Iean 2.
 L'onction que vous avez receuë demeure en
 vous, & vous enseigne toutes choses. Et est ceste
 onction appellée huile de liesse, c'est à dire res-
 iouissante, pource que les fructs de l'esprit sont
 ioye & paix. Gal. 5. 22. Rom. 12. 17. Et là où est l'Es-
 prit de Christ, 2. Cor 3. là est liberté.

Or pource que ceste onction, tant és char-
 ges susdites qu'és graces en pleine mesure est
 propre à Iesus Christ seul, & incommunicable
 à tout autre, il est dit, Ex. 30. 32. où la compo-
 sition de l'onction d'Aaron est prescrite, on
 n'oindra point d'icelle la chair d'aucun hom-
 me, & ne ferez point de composition sembla-
 ble à icelle, car elle est sainte. Quiconque
 composera oignement semblable sera retran-
 ché d'entre les peuples, ou qui mettra d'icelui
 sur vn autre.

Or

Or ceste double onction , l'une qui donne la charge , l'autre qui confere les graces nous tire d'une difficulté , ſçavoir , ſi Ieſus Chriſt a receu ceste onction en ſa nature Divine, ou en ſa nature humaine , ou en l'une & en l'autre. La reſponſe eſt , que quant aux graces de Dieu, la Diuinité ne les a point receües, ains c'eſt elle qui les a conferées à l'humanité; mais quant à l'eſtabliſſement en la charge , il ne faut point douter que l'une & l'autre nature n'ait eſté eſtablie en la charge de Mediateur , quoi que l'Egliſe Romaine tienne qu'il n'eſt noſtre Mediateur qu'entant qu'homme; pource qu'il eſt Iuge entant que Dieu, ne pouuant (diſent-ils) eſtre Iuge & aduocat, autrement il intercederoit enuers ſoi-meſme. Ceste doctrine eſt erronée. Car Ieſus Chriſt n'eſtoit-il point Mediateur auant ſon Incarnation? N'eſt-il pas appellé par Malachie 3.1. l'Ange de l'Alliance? L'Apoſtre ne dit-il pas qu'il eſt Sacrificateur eternellement? Heb. 6. 20. & 7. 27. & 9. 14. Et celui qui offre vn Sacrifice n'eſt-il pas Sacrificateur , comme dit le meſme Apoſtre , qu'il s'eſt offert à Dieu par l'Esprit Eternel? Car autrement l'offrande n'euſt pas eu vne vertu & prix infini ; ſi celui qui offre n'euſt eſté infini. Ioignez à cela que donner le Sainct Esprit eſt vn des deuoirs de ceste Royauté , & vn eſſ. ct de la Diuinité : car qui peut donner le Sainct Esprit de Dieu que Dieu meſme? L'Apoſtre ſainct Paul dit voirement que nous auons vn moyennneur entre Dieu & les hommes , ſçavoir Ieſus Chriſt homme : mais ce

mot homme n'est pas mis pour exclure la Diuinité, mais pour dire que nous auons vn Mediateur accessible, pource qu'il est de nostre nature, afin que nous ne soyons effrayez par sa Maieité diuine. Quant à ce qu'on dit qu'il ne peut estre iuge & aduocat, ni interceder enuers soi-mesme: cette objection est faite d'entendre comment Iesus Christ intercede. On pense que c'est en formant des prieres, ou produisant des raisons persuasives, pour esmouuoit ou encliner à misericorde le Iuge celeste, lui faisant changer de volonté plus par persuasions comme sont les Aduocats deuant les Iuges, qui est vn grand abus.

Dieu n'est point suiet à compassion, il ne change point de volonté, il n'est point fleschi par persuasions. Et la volonté du Fils n'est point plus encline à nous bien faire que celle du Pere. Mais Iesus Christ est dit interceder pour nous entant qu'il fournit au Pere sens & matiere de nous bienfaire: & que le Pere nous voulant exaucer iette l'œil sur la satisfaction que son fils lui a presentee. Or n'y a-il point d'inconuenient que le Fils fournisse au Pere & à soi mesme matiere & occasion de nous bien faire. Receuons seulement deux choses. L'vne que la nature Diuine du Fils a esté estable en cette Royauté, non pas en celle qu'il a de toute eternité sur toutes creatures, mais en celle par laquelle il a esté établi chef de l'Eglise qu'il a achetée par son propre sang: de laquelle Royauté l'Apostre dit 1. Cor. ch. 15. que

Iesus

Iesus Christ entant qu'homme se despoüillera au dernier iout & la remettra entre les mains de son Pere: L'autre poinct est, que la Diuinité par ceste action sacree communique plenitude de graces à l'humanité, mais non pour auoir ses vertus en pareil degré qu'elles sont de la Diuinité. Car en la Diuinité elles sont l'essence & la substance propre, & mesmes ne sont pas plusieurs vertus, mais vne vertu qui est son essence mesme, laquelle vertu a diuers noms selon ses diuers effects, mais ces vertus en l'humanité ce sont qualitez & ornemens spirituels. Qui plus est l'Escriture sainte attribuë à Dieu des vertus qui ne peuvent aucunement conuenir à l'humanité. Comme de n'auoir point de commencement. Estre infini & incomprehensible. Estre par tout en mesme temps, pource que telles perfections aboliroyent la nature humaine. Comme le feu communique au fer la chaleur, mais ne lui communique pas sa legereté ni sa figure, pource qu'alors ce ne seroit plus fer: Ainsi la Diuinité communique toutes sortes de vertus & perfections à l'humanité, hors mis celles qui ruineroyent l'humanité, & feroient qu'il ne seroit plus homme. Cependant les vertus de la Diuinité sont en quelque façon à l'humanité, non pas qu'elles soyent en elle, mais parce que c'est vne mesme personne.

Iesus Christ a deux Royaumes. L'vn sur tout le monde: L'autre sur son Eglise. L'vn est sa possession qu'il a de nature. L'autre est vne

F

acquisition par les souffrances. En l'un il regne par la puissance, en l'autre il regne par son saint Esprit & par la parole. Le monde est le Royaume de Iesus Christ, mais l'Eglise est sa famille, c'est sa portion, son propre acquêt. Ce qu'estoit le iardin de Dieu parmi le reste de la terre: Ce qu'estoit la portion des Israelites au milieu du pays d'Egypte: Ce qu'estoyent les dismes des Sacrificateurs au milieu des fructs de tout le pays: Cela est l'Eglise au milieu du reste des hommes. Iesus Christ regne sur tous hommes, mais quant aux fideles il regne non seulement sur eux, mais aussi en eux, tirant d'eux vne obeysance non point d'esclaves, mais d'enfans. Le Royaume de Iesus Christ sur tout le monde ne vient point, mais est desia venu, & est tousiours en sa perfection: Mais du regne de son Eglise, nous disons: *Ton regne auienne.* Nous ne cerchons point le Royaume que Iesus Christ a sur toute creature, car nous y sommes, & quand nous voudrions nous ne pourrions le faire: mais du regne qui est son Eglise, il nous dit en saint Matthieu chap. 6. Cherchez le Royaume de Dieu & sa iustice. Tous obeyssent à cet Empire general, mesmes les Diabes, mais quant aux suiets de ce second regne qui est l'Eglise ils n'y obeyssent pas comme ils vouldroyent, & reste tousiours en eux en cette vie quelques reliques de desobeyssance. Pour le faire court. Je di que l'Eglise est vn Royaume dont le Roi est Iesus Christ, dont les suiets sont les fideles, dont le sceptre est la predication

dication accompagnée de l'efficace de l'Esprit de Dieu, dont les armoiries sont le nom de Christ : dont la monnoye portant l'Image du Prince sont nos cœurs qu'il reforme à son image.

Ce Royaume n'est point en pays de Coustume, mais en pays de droict escrit, se gouvernant par les loix contenues és saintes Escritures, ses limites ne sont point riuieres ni mers, ni montagnes, mais l'election de Dieu qui discerne les hommes : ses frontieres sont par tout. Car par tout on est aux mains avec le Diable & avec le monde. Ses munitions ne sont point en Arcenal ni forteresses de villes, mais en la prouidence de Dieu.

Il se gouuerne non par maxime d'Estat ni par prudence humaine : ains pour l'establir Iesus Christ a enuoyé des pauvres pescheurs sans force & sans lettres : & l'a tousiours conserué parmi nos imprudences contre la ruse & prudence des hommes. Les Empires armez de forces, gouuernez de prudence sont rombez, mais l'Eglise demeure & demeurera iusques à la fin.

Ils ont ses ennemis, Satan, le monde, nostre chair, lesquels on surmonte, ou en fuyant quand il nous allechent & sollicitent, ou en demeurant fermes lors qu'ils nous espouuantent par la crainte des persecutions & nous donnent des fausses alarmes. Et nous mesmes combattons contre les suggestions de l'Esprit de Dieu, & ne lui obeyssans point qu'apres beaucoup de resistance : apres lequel combat Dieu nous ayant

vaincus, le fruit du combat n'est point pour le vainqueur, mais pour le vaincu, & que Iesus Christ s'est conquis.

Ce regne est vn regne de grace, & vne entree au regne de gloire, comme le lieu Sainct deuant le sanctuaire, comme l'antichambre du Cabinet du Roi celeste.

Car nul ne regnera au ciel avec Iesus Christ, si premierement Iesus Christ ne regne en son cœur, & ne possede son ame par l'Esprit de sanctification.

L'office de ce Roi est qu'estant assis à la dextre de Dieu il nous defend, nous gouerne par son Esprit & par sa parole, verse dans nos cœurs ses graces, & nous soustient es tentations.

La seconde charge dependant de cette onction est la Sacrificature, laquelle sous la loi consistoit en trois choses. 1. A prier pour le peuple. 2. A satisfaire à Dieu pour lui par offrandes & sacrifices. 3. A l'enseigner. Nous auons ces trois choses en Iesus Christ: 1. Car il est assis à la destre de Dieu faisant requeste pour nous, Rom. 8 33. 2. Il s'est donné soi mesme pour nous en oblations & sacrifice à Dieu, en odeur de bonne senteur. 3. Il nous instruit en la volonté de son Pere. Aussi a-il accompli en verité les choses qu'Aaron faisoit en figure. Aaron offroit le parfum continuel pour figurer. que la mort de Iesus Christ est de bonne odeur perpetuellement deuant Dieu. Aaron entroit au lieu tres sainct vne fois l'an avec sang. Ainsi Iesus

Iesus Christ est entré vne fois au ciel pourtant le benefice de sa mort pour le presenter deuant Dieu. Aaron portoit sur ses espauls les noms des lignées d'Israel engrauees, pour figurer que Iesus Christ a chargé nos douleurs, a porté nos langueurs, Esa. ch. 53. Aaron portoit les mesmes noms escrits sur son cœur pour monstrier l'affection que Iesus Christ nous a portée.

A la mort du souuerain Sacrificateur les prisonniers és villes de refuge estoient mis en liberté, pour figurer que par la mort de Iesus Christ les pecheurs detenues sous la malediction de la Loi sont mis en liberté. Par lui nous offrons à Dieu sacrifice agreable. Hebr. 13. Car comme les sacrifices mis sur vn autre Autel que sur l'Autel des holocaustes institué de Dieu, quand mesmes l'Autel eust esté d'or, & les sacrifices de grand prix n'eussent point esté agreables à Dieu: ainsi nos prieres & nos œuvres quelque apparence de sainteté qu'elles ayent ne sont point agreables à Dieu s'ils lui sont presentees sur autre recommandation que par l'intercession de nostre Seigneur Iesus Christ. C'est le propre de ce Sacrificateur d'estre l'offrant & l'offrande, & de demeurer Sacrificateur à iamais.

La charge de Prophete (qui est la troisieme de cette onction) estoit de predire au peuple les choses à venir, les iugemens de Dieu apparencez, les deliurances futures, entretenir l'Eglise en l'attente du Redempteur, annoncer au peuple la volonté de Dieu. Il est bien vrai que les Sacrificateurs enseignoyent aussi,

comme il est dit au 2. des Chroniques 15. Plusieurs jours se sont passez en Israel, sans le vrai Dieu, sans Sacrificateur & Seigneur & sans lui. Et en Malach. 2. les leures du Sacrificateur gardoyent la science, & on recherchoit la loi de sa bouche, d'autant qu'il est le Messager de l'Eternel des armées: mais ils enseignoient autrement que les Prophetes.

La charge des Sacrificateurs estoit ordinaire, celle des Prophetes extraordinaire. Les Sacrificateurs exposoyent seulement la loi, mais les Prophetes predisoient aussi les choses futures. Les Sacrificateurs pouvoient errer souuent: mais les Prophetes assurez de Dieu ne pouvoient errer, car Dieu parloit par leur bouche estans suscitez extraordinairement lors que le ministere ordinaire estoit corrompu. Or Iesus Christ est nostre vrai & souuerain Prophete qui nous a manifesté le conseil de Dieu appareillé à nostre gloire. Le fils issu du sein du Pere, lui mesme nous l'a relevé. Iean 1. Ainsi qu'il dit en l'Evangile, les choses que ie di ie les ai ouyes de mon Pere. Lui mesme a repurgé la loi, des corruptions & fausses interpretations des Scribes & Pharisiens Matt. 5. & 19. Mais le principal est que pendant que nous annonçons sa parole & frappons l'oreille en dehors il touche le cœur au dedans, & escrit non d'encre, mais d'esprit, non étables de pierre, mais étables de chair, estant le Docteur des esprits, ayant institué le ministere en son Eglise, afin qu'apres son depart la doctrine qu'il a publiee fust perpetuee

tuée entre les hommes.

Sur ces trois charges le Pape enjambe sur la Royauté en se disant chef de l'Eglise, & en pardonnant les pechez en autorité de iuge, & en donnant des loix à l'Eglise, dont les vnes contrarient, les autres adioustent à la parole de Dieu, & sont plus soigneusement recommandées & pratiquées que les commandemens de Dieu. Sur la sacrificature & establissement d'autres Sacrificateurs pour sacrifier Iesus Christ à Dieu pour nostre redemption. Sur la prophetie il s'attribue de ne pouuoir errer en la foi, & d'estre iuge souuerain de toutes les doutes de la foi & de pouuoir establir des articles de foi.

Dieu vueille imprimer ceste doctrine en nos cœurs, & nous ayant fait Disciples de ce souuerain Prophete qui est la sapience eternelle. Et faits Sacrificateurs pour offrir sacrifice de louiange, nous vueille aussi faire Rois avec son fils pour regner avec lui eternellement. Amen.